

四庫全書

集部

欽定四庫全書

集部

少谷集卷五

六

詳校官庶吉士_臣李如筠

中書_臣劉源溥覆勘

總校官知縣_臣楊懋珩

校對官編修_臣沈清藻

謄錄監生_臣黃臣鵠

欽定四庫全書

山谷集卷五

明 鄭善夫 撰

五言律

送人歸渤海

爾去秦臺上秦臺秋正繁
城深渤海郡草歇樂陵原
蓮閣風雲至若華波浪翻
看君有道氣早晚共騰騫

送人之宣州二首

白也風流處雲山滿意幽茲為宛水隱況得敬亭遊桃
李含清夜梧桐下素秋澄江淨何日轉憶謝宣州

其二

宣城仙聖地山水作名州石控琴高鯉江深謝眺樓白
龍降已久黃鶴喚何由爾去乘雲月飄飄過十洲

送屠文治侍御使蒼梧

衰颯仍乖別羈棲幾過從驚駘無熟路鷹隼自秋空銅
柱扶桑下鬱林滄海東南征且鄉邑大不類秋蓬

張子言家移旋覆草

旋覆知名草秋齋不住花羣芳盡搖落此地且年華坐
領幽人意行辭處士家相看到霜雪採掇輔丹沙

吾邦

喪亂秋風起吾邦爾獨回徒傷羈鳥賦不見釣龍臺少
谷芝仍茁南昌角正哀建安七子下流落仲宣才

送蔣君佩視弟還譙

太丘二令子伯也是難兄樞下垂騏驎原頭過鵲鷁燕

關共卧後毫社獨歸情萬國今戎馬愁雲日夜停

屏息

屏息經綸志棲遲閭闔雲風塵蒙不解龍虎亂相聞祇
有還山夢空餘諫獵文長纓繫越頸感激漢終軍

薛君采見過

薛稷過逢日新詩向我傳聊炊太倉米一誦陝郊篇薄
宦虛談劒危時合引年秋風下滄海擲置廣文氊

題虎溪三笑圖

東林卓錫地宛在崑崙西蓮社誰堪入廬峰不可梯一
空無色相三笑豈菩提便合攢眉去酩酊過虎溪

送林以乘謫夷陵二首

宜都三峽口遷客意如何落日黃陵廟秋風駭浪多巴
蠻伐鼓祭江女踏蹄歌莫唱渝州曲猿聲近汨羅

其二

水部青雲志憂君雙鬢斑同時諫羽獵獨爾竄荆蠻波
撼黃牛峽天連白虎關棲遲下客食直以長瑜還

秋月

秋月長安社光清太液池
蟾蜍終不滅烏鵲竟何之
鐵騎喧今夜金波及四夷
關山正阻絕却向遂中吹

思道約遊西山病不赴漫答兼問宗林二首

嗟爾崇陵客乖期秋獨歸
香山有夙諾幽事忽相違
木石機心損雲霞朔氣微
時時夢魚鳥未返薜蘿衣

其二

昔遊湖上寺猶記釋宗林
語我菩提樹恒河深復深
風

沙晚識面江海後知音白鶴翩翩去青天何處尋

聞西江亂

乍發洪都使風傳消息回荆吳得劇孟江漢尚深哀畫
角連城動黃衫自將來萬方思繫虜寧乏亞夫才

十日對酒姚氏園二首

野老經時病深秋出郭情輞川聊對酒京洛未離榮小
水行丹壑餘花藉綺楹松陰立不倦何限暮濤聲

其二

病跨山公馬秋過習氏池遠天鴻鴈盡昨日菊花期
碁局翻相惱鷗羣總不疑生涯抱甕外一任隱君為

上毘盧閣二首

遠上毘盧閣崇高望不稀關山仍此地城闕自斜暉羽
檄流星過行營萬馬圍漁陽暮色至引領翠華歸

其二

閣迥臨虛曠秋高入渺茫燕歌動易水駿骨望昭王日
落城笳起天寒塞草黃揚雄輟扈從空自賦長楊

城戍

戍鼓長鳴夜軍容更入朝北風塵漠漠南討意迢迢
祇有蒼梧狩能無黃澤謠遐方盡玉帛八駿自應驕

陳執之宅同諸君酌菊二首

祇抱霜雪姿風沙悵獨悲親朋更此地酩酊對花枝
栗里歸心遠瀟湘秋事遲東君不相識只自向華滋

其二

繡衣都下宅叢菊好花枝延客尊罍罷良宵風露垂
娉

婷豈自媚遲暮宛相宜故國黿峰上繁英今滿籬

冬日順門陪九卿請駕視牲

春曙復冬初仍瞻白鷺車禮從郊廟損天入震離虛江
漢哀戎馬巖堂望諫書生慙百里子去國意躊躇

送蘇侍御從仁使蜀

驄馬今何去玄冥歲已殘風雲行劒閣鉦鼓動松潘事
在西戎部功虧舊將壇懷柔亦邊略要識聖恩寬

依依

獨有南冠客依依郭氏臺未酣燕市酒翻惜隴頭梅漢
戍連城動秦關千角哀縣金買駿地徒使壯心頽

夢與王陽明論學

美人入我夢惠我白雲詞述作何多事經綸非爾時空
齋下鳥雀深水伏龍螭尚愧瑤華贈悠悠江漢思

東顧華玉

在昔過逢日天台山雪生何期易水上同憶赤霞城杯
動青春色堂含滄海聲終焉謝朱紱攜手石梁行

送人之贛州

西江兵亂後作宦意悠悠
祇愛青油幕高橫白鷺洲
風塵都下戰歲月贛江流
應羨陶皮隱桃花開未休

贈方梅墅

方干樂道處小墅野梅開
對客翻高調飛花片片來
蘿雲蒙卧榻隴日照行杯
不耐王孫思春深未却回

送人之惠州

名家叅政下獨覺仲容賢
宦轍今何往卑棲此最便
物

情滄海俗天氣百蠻煙祗近啼猿樹鄉心日夜縣

馬伯淳西歸

與君同去國別路各悠悠吾邑東海上終南西雍州何
時報縞帶於此解紆裘萬事將慈母長歌渭水流

春暮遊城西寺

毘盧千佛閣近在綠雲中客到虛無岸春歸鶯燕業取燕
臺望不及古意渺何窮擬入東林社殷勤向遠公

山人

呂公嘉遯處雲鳥靜相親日與嵇中散沈冥山水濱
鴈蕩斜連海桃源直避秦齋居玩易理龍性可能馴

別林克相二首

鄴下傳詩句滄洲拂釣竿正思龍臥穩翻惜鴈歸難
燕壁雲回合閩關天鬱盤飛騰最憐汝慷慨一彈冠

其二

汝復彈冠出余今解綬回平生一掬淚灑向黃金臺
戎馬東南劇鼓鼙城闕哀無能奏羽獵翻愧子雲才

贈吳生

稻粱荒楚塞鴻雁尚安歸
祇避雲中彈冥冥天外飛
子有鸞鳳質枋榆非所依
風塵好自惜莫損綵雲衣

贈山人受封

念彼南山隱南山鬱自怡
時聞春雨外高倡紫芝詞
猿鶴心同遠裘羊徑不緇
莫嫌兒女笑宮錦照龐眉

崑崙子

君本崑崙客巖扉星漢連
流沙拂袖去述作為誰傳
紫

芝秀可掇青牛何當還異時求物色蕭颯白駒篇

安陵阻風

落日安陵上荒蕪望薊丘風沙無晝夜家室此淹留江
漢悲多故干戈賦遠遊河清是何日吾志欲東周

遊金山寺

地控恒沙界峰迴滄海波潮聲永夜壯雲氣秣陵多龍
窟存光怪蛟宮湛綺羅黃旂蔽江左何日返天戈

贈杭方伯兼柬東卿提學

邠原猶薄宦疏廣已遺榮無復周王獵誰欽釣渭名余
亦武夷去探玄學久生逢君五湖畔北眺有餘情

同晉陵諸子遊水西二首

共有煙霞想言過西水潯薜蘿迷遠近魚鳥入高深花
氣含風滿山堂附郭陰宴酣忘主客誰賦越鄉吟

其二

喜到晉陵郡行逢諸子招竹林初散帙槐樹已鳴蜩遶
徑馴朱鶴通池接畫橈遙思荷篠者去作羽山樵

陳遂初進士邀宿頽谷草堂夜觀西湖漁火

稅駕歸閩土尋山入浙中客情逢勝友東路任飛蓬
夜艇流漁火秋杯折渚筩巢由聖世事直北大明宮

錢塘映江樓冥坐觀潮

錢王此開濟旋入宋山河潮汐秋來壯雷霆水上多
尚傳江有怒翻恨海無波颯颯攢陵樹悲風日夜過

過孫山人苔溪舊居

耿耿憶孫楚溪邊青竹門未同苔水月竟失漢陰原
壽

天真詮外風雲孤夢存平生少谷榻獨下向誰論

寄施粵之侍御

南昌隱君子寄跡綠雲端念爾神交久慙余色會難此
時歌伐木伊昔阻風湍何日下縣榻相看黃籜冠

碧巖下小憇望太湖

長夏碧巖好蕭蕭千竹林看山白屋靜息駕古藤陰震
澤驚波在洞庭歸鳥深楚臣新去國漫有卜居吟

謁孫太初墳二首

草堂琴瑟罷羽化竟何如那復烏藤杖空傳白鹿車沙
湍且鷗鳥天地即蘧廬白首林君復終無封禪書

其二

伊昔丘園隱風流誰似君談詩振大雅抗志入高雲宅
擬王官谷山名太白墳寥寥廣陵散定向夜深聞

宿歸雲菴

澤國變元氣名山留晚芳雲藏伏虎寺花近挂瓢堂鵝
鵲飛騰遠漁樵言笑長沉冥達者事散地即慈航

寄赤城諸子

自別赤城去藏身金馬門尊鱸心獨苦林壑道何尊萬
事風波過三年魂夢存終焉共攜手採秀入桃源

贈張南陵

張翰風流在南陵谿谷間一為香案吏便得敬亭山飯
飽鱸魚味身隨鷗鳥班後期望星漢知爾御風還

宿勝果寺

游吳復適越漫宿贊公房小隱薜蘿密大觀江海長鉢

龍蟠夜壑雲邃語秋堂稍覺菩提長森森松檟涼

贈秀公

不作尋詩計沉情日閉關牛車載上乘錫杖拄空山玩
世風塵外放身花鳥間秋齋食橡栗見爾好客顏

題潘山人水居

習靜不出郭著書長閉門烟霞結白日薜芷避緇氛巾
舄從吾好鍾鼎有道存埋名愛蔣詡多事恁揚雲

荒村

荒村連日雨散髮不曾梳歲月報恩子生涯種樹書無
因致故舊豈是愛空虛門巷曈曈日輕車恣所如

贈葉少府

吾聞隰城尉通練更文章坐掃封狐雪行開射鴨堂詩
篇窮地秘海水識風涼似爾紆黃綬巢雲意不忘

行宋宮故基

西門數頃地舊是帝王宮複道清波沒粧臺碧蘚空王
侯混喪狗臣庶議從龍莫謾歌禾黍山河涕淚中

吳山

吳山入闌闌佳氣自蒼蒼
洞窈通仙隱龍盤集吉祥
猶宜雪後對莫為歲寒妨
所歷多酸鼻茲山耿不忘

鳳林

鳳林五百戶活計在山溪
野碓遠隄水嵒田高治畦
新年傳糗餌舊俗誦菩提
生女無人育男長少娶妻

方巔峰

盤礴地靈在東南天柱高三江轉
燕尾百粵亂牛毛未

出無生網難忘大覺刀巢雲定何日萬國且旌旄

九日方山登高

方山五片石巉巖七千尋氣象恒蒿敵風雲歲月深百
年大夢寐九日此登臨願卸紅塵累崑樓長道心

耳鳴

官司忽失職雙耳自今聾盡日聞天鼓何時聽麼蟲向
人艱應答於世類冥蒙未老神俱耗勛名涕淚中

寄華玉

瀟灑顧吏部為邦日漸多人心興禮樂世事入風波剗
曲舟堪誦濠梁道不磨向來巾子雪堂構合如何

新昌縣曉行

暝發新昌縣晨臨赤土隈秋花隨地有渚鴈與雲來雜
樹炊煙出前涇山照回忽聞歌伐木行路興悠哉

繡嶺曉行

繡嶺行不極盤山霄漢長誰將釣渭意同寄鴈湖傍野
宿雀芋飯巖居木槿牆晨征莫相失雲氣正茫茫

金山紀勝

揚子宅前水東溟勢欲吞乾坤真浩蕩島嶼盡兒孫石
舞風波作龍歸日月昏平生愛飛動長劍倚崑崙

集勝果寺分得眠字

寺閣茲辰會賓朋盡世賢雲山兼勝日巖壑得高眠移
席竹林晚題詩花蕊妍燕鴻何意緒來往各翩翩

遊爛柯山同楊節使二首

太末徐王國青霞洞府名江山共吾子風雨若平生錦

卷五
樹巖扉淨秋杯雲鳥明應悲看碁者柯爛未忘情

其二

窄甕千峰下天開姑蔑墟地靈蕃玉蕊神至響雲車未
破人間局先繙石室書茅靡入道衍歲晚莫踟躕

風雨過南關

元亮東歸日長途菊正斑寧辭彭澤米早得匡廬山雨
勢秋崩峽雲陰晝阨關回思鳳凰閣吾已得生還

贈姜建州

南遷為隱吏山水興難降客至丹青閣時翻白玉缸諫
書留御榻惠政及隣邦若訪漢陰老知余是姓龐

送李曲江

李子新為令南遷百粵州梅花過庾嶺吹滿曲江頭鵬
運天池暮槎停星漢秋丹砂好寄與早晚上羅浮

寄倪南雄

京華相別後聞爾亦南圖笑解銀魚綬坐分銅虎符山
蟠五嶺厚俗到百蠻殊千里梅花使春風好寄余

送王文輝遊武夷

王郎不肯住脫屣武夷山學道心長苦尋仙髯欲斑魚
龍淹海日驚鵲厲天關何限滄洲興希君共一扳

送公衡韶州省覲兼懷倪南雄李曲江二首

爾往寧親日千花春未稀此行無道路綵戲及庭闈王
勃才名盛孫登世事微如逢始興守道我釣魚磯

其二

擬此過逢數何期迅別愁青山問庾嶺滄海近韶州猿

狔聲堪聽枕柳葉正稠風煙易春暮須及曲江樓

暮春湖上

滄溟春欲暮湖上芳草生風煙吹不斷遙帶鳳凰城萬
事兵戈外孤臣藜藿情何當拊神物談笑掃欃槍

詹文化

報爾龍頭選才名我昔聞鳳凰今有象騏驎直空羣黃
散經綸事金滕禮樂文更期射三策早晚奏明君

夏公謹

四海夏公謹平生道未疎豈為青瑣客不問白菟裾帝
業維新日皇興草昧初看君抱經濟獻納定何如

戴宗道

小戴青雲器明經正顯行以茲先後甲知爾廟廊情樛
櫟人俱棄鳳麟世必清經年無一字何以慰平生

林克相

厓老本釣侶經綸今若何自來科目選祇為利名多江
漢波初定夔龍道不磨南冠有詞賦萬古卿雲歌

梁日孚

梁鴻終自潔祿仕甦樓遲混世名為佛修身早得師兒
童送我意俯仰別君時何日長安市相過筇一枝

方思道

方郎天下士慷慨古人稀刎頸交惟女同心結到誰江
湖同苦別霄漢獨雄飛遠媿朝歌叟中興淹桂枝

汪希周

崇陽汪武選識汝自京華拊劒平江漢經年別室家飛

雲收虎帳戰馬返龍沙長揖青門外何人善種瓜

林德敷

聖后乘元化江湖思致身君居財賦地況作廟堂臣
勛業時堪就鱸蓴興莫新何當逐狐鼠同看帝城春

鄭伯興

吾宗賢吏部昔往鹿門山應世身難卧探玄意自閒
山公啟事近龐老攜家還余亦隆中隱接君牀下顏

蘇天秀

吾憐蘇太乙磊砢長安豪釣罷渭川獵名馳天漢曹言
余亦善士拊已媿時髦徐稚平生義還山解佩刀

姚元肖

接手燕昭國倥傯十載前烏栖空繞樹鵬轉自橫天撫
世緣知己掄才後少年君看越石父客禮竟虛傳

顧九和

崑山顧學士十載綰銀魚勛業天人策行藏封禪書與
君成去住謀道竟何如先帝焚香在皇情可但虛

陸子淵

成賢真此地瑶席爾司成述作回中古機雲媿後生華
亭鶴正唳蓬海鴈長征結誼風塵上看君萬里情

寄劉希尹吏部兼懷薛君采二首

長安薛子宅對爾誦驪駒雲樹懷良友風塵媿腐儒看
山費日月憂國阻江湖方朔金門下藏身道不孤

其二

薛郎成小隱舊宅定荒蕪萬事將雙淚經年無尺書身

隨梅福去病與馬卿殊白日調龍虎飛騰意有餘

龍門西象頂望海

浩蕩窺南紀長天望正繁北風青嘯海高浪白浮山舟
楫思兼濟雲霄悵獨還何當沂牛女重扣紫皇關

岷江送黃伯固大理赴白下

大理平生友相看涕淚存諫書君最切往事我難論放
逐心無盡巖廊道已尊願將金石志長報聖明恩

送人之鄴

浩蕩夷亭意經過鄴下來王門占玉節春日上銅臺遊
子牽多夢高堂候舉杯靡蕪江畔草應挽使船回

明妃曲

明妃初出塞宛轉意何窮上馬琵琶曲流悲入漢宮自
言妾命薄萬里去和戎今日靡蕪草青青向隴中

木虛過青野堂夜坐

小坐同吾子荒齋寡四隣林鶻鳴近夜山月迥隨人太
乙青藜杖先生烏角巾中宵莫說劍恐益髭毛新

訪吳山人隱所

脫屣吳居士尋君江水遙
雲房生夜氣薜牖散春潮
榻靜聞空籟情高夢九霄
從茲畢靈寶不赴小山招

答陳天游

淑氣回南紀文星傷省堂
猶縣滄海月留照紫薇郎
學道防衰晚愁時應帝王
思君直咫尺一夕鬢毛蒼

湖中寒食

湖上逢寒食行行雲日迷
林花相映發只似武陵溪
遠

水清煙並高楊黃鳥啼年年對芳草古意滿城西

答林貞孚主客

憶自秋風起虛傳奉使回未捐池上珮翻失隴頭梅堯
舜垂衣日班揚奏賦才黃金散朝士知上禮賢臺

送吳德翼僉憲赴闕

使君今赴闕春興定脩然江漢黃華動風雲錦纜牽星
移南斗下路引北堂前願有華封祝天朝壽萬年

夏夕青野堂卧月

海月團芳夜園廬引緒風琴書棲榻晏巖壑與人同尚
澤南山霧終懷北極楓黃虞忽到夢伊鬱卧隆中

入海

滄海鷗波外雲艘迥自航大江沉馬腹密雨濕魚梁未
及星槎遠那知天漢長漁竿變孤志翻愧紫荷裳

大末憶方思道

遠憐方比部經歲斷來書何日垂嘉樹青青拂敝廬累
憎鴻鴈響三見柳條疎幽獨疲孤夢松齋月正虛

答顧華玉叅政

吾憐顧長康更隱近滄浪學道通元竅蛟龍翊爾翔雲
回朱鳥國花照紫薇堂授我冥筌意相期天漢長

閉門

經歲避塵緣時叅道德篇柴門背海閉鷗鳥受人憐桂
樹栽成實松花採作團微官渾忘却唯記孝皇年

聞薦

逋客晚知幾西山言採薇長安三丈雪而我賞心違隱

處無人識薦書何事飛冥鴻
天萬里空遣弋人歸

早秋懷晉安諸子

搖落茭湖晚湖邊鷓鴣鳴
秋風吹桂樹一佇越王城
榻有南州重人兼衛玠清
還聞刷羽翮看爾共蜚聲

寄贈石室山人

安期持世界挾策西入關
吳老遵牛渚乘槎釣不還
行藏元氣裏弓劍彩雲間
何時留玉舄去入蓬萊山

病中

避地拋銅墨風霜歲屢更
那期鳳鳥至亦遣伏雌鳴
久病丹心苦中年白髮生
如何張仲蔚却掃卧昇平

出塞曲二首

黃金凋鵲印白馬出榆林
瀚海行人絕陰山殺氣深
漢恩長北損邊騎日南侵
一唱丁都護三軍淚滿襟

其二

大王開絕域上將喜邊功
塞外風煙異軍中苦樂同
龍旂凋朔氣虎帳卧沙風
未繫單于頸橫戈意氣雄

送楊明府入覲

雙闕玄霄上三山滄海邊
雲遙望鳬舄明府似神仙
曲報離城調琴希清廟絃
煩君告天子百姓尚顛連

克相過草堂別去余病垂死
詩來見懷呻吟中答之

喜女文章貴相過成笑言
追陪憎病骨風雨別柴門
會苦青衫濕情多白髮繁
形骸已近死誰復與招魂

病中哭伯固二首

我眼雙枯盡那堪更哭君平生猶鐵石靈爽定風雲
藿雖同志鳳麟不戀羣吾徒向凋謝誰斲太平文

其二

去年白下去送汝芋原陂今日湖邊問俾余雙淚垂
終為諫議鬼竟失帝王師已矣先朝事傷哉此盛時

陳少府鑰

吾憐陳少府獨抱明月珠五載官閩土春風生向隅
縣知水薤意頻握玉麟符霄漢聲名早看君受劍車

張起溟約過草堂為傳卒所誤

君是峨眉秀余慙南海琛並期歌白雪何止斷黃金接
手難如此浮生感獨深閩關及漳水魚腹莫教沉

答林白石大叅

歸釣龍溪水君胡亟失時豈因白石爛竟賦綠衣詩拙
抱江湖愧賢於弼亮宜重華迹已遠吾道欲何之

七月望遊水西白鶴寺乘月泛峴江

愛爾東林社乘秋到藥宮招邀蒲童冠歌罷舞雩風鶴

鶴黃庭莫巾袍白露中西江上雲月歸艇意何窮

送季明德應召赴闕二首

接手為兄弟交期共死生雲遠易相失三宿晉安城海
內風塵切秋邊鴻鴈鳴飛騰未時莫萬里好長征

其二

相別無一語相觀情自閒風雲感壯士江海散秋顏道
已干時禁人須涉世艱去鄉莫草草遲爾陽明山

琅琊王墓下作

田文全盛日淚下雍門彈王氏千秋後勞歌玉樹殘寢
園生兔穴疑塚奠龍盤萬仞蓮花色關河望已難

大田讀伯固起溟見和之作悵然懷答二首

讀爾懷沙賦潛然繫我思當年分即死此日已云遲社
稷還唐介江山哭子期才賢世有幾況及聖明時

其二

竭來張仲蔚秀句日逾多豈不思君子其如長路何商
霖憐我在谷口喜人過終愧箕山隱無能守薜蘿

南山贈林遷于比部

憶自隨三釜同歌滄海篇何期傷九日得結碧山緣江
漢兵戈外風煙魚鴈前相看未忍別更上木蘭船

莆口之敗福寧兵最無紀律大縱掠金以致肝腦
塗地賦詩傷之

閩粵何多難興漳師未休虎豺行白日天地泣清秋欲
擣羣兇穴須臾敗將頭兵貪法半至遺恨福寧州

劍州贈陳待用太守

鬱彼神仙府雲驂迥莫扳言將五袴手滿弄九華山紫
蓋風塵表黃堂霄漢間因君覓神物劍水有龍蟠

鸛鵒

鸛鵒無拘碍浮游錦石傍雌雄互飲啄毛羽割陰陽已
得滄洲趣寧思天漢翔並生大化裏幽獨闡文章

不寐

反側終難寐寒天候不明經旬淹厲氣永夜厭灘聲萬
事呻吟外他鄉兒女情還聞喪良友展轉淚交橫

哭遂初

良友看餘幾今年報女亡江山有潁谷風雨泣秋堂元氣能無損星文定不光連宵激孤志灑涕向錢塘

送羅復之

聖壽齊天地臣衷効海山面陳安瘼疏頭聳觸邪冠玉帛奔重譯衣裳濟萬官不勝戀闕處時事尚多艱

春日懷南湖舊居

南湖不可到幽事自漣漪田父春相遣隣翁暮與期煙

霞隱薜荔風日曬鷓鴣豈待清商發花時有所思

雙鳧

汎汎長依渚飛飛不度岑却無黃鵠志但有白鷗心煙
水知音舊魚蝦得食淫自從葉縣令來徃五雲深

向曉

河影忽不見東方方小明晨鷄許市客秋管海邊營起
舞者誰子飄零獨此生矇矓聽金鑰封事轉馳情

朝雨

若木光初判玄雲復積陰撼江風色勁灑壁雨聲淫泉
室鮫人泣天邊越客吟餘情何處訴燕雀處堂深

將旦

曙色浮東海騰騰漸太清明霞低水檻宿霧迥江城警
柝已罷擊征人初啓行豺狼今挈領豈是乏長纓

與方質父登于山

巾舄動高興江山入大觀煙霞幾回首天地一凭欄晴
日千村晚長風五月寒莫嫌踪跡遠石室在人間

雨夜

蕭蕭風振屋汎汎雨鳴樓宿鳥驚巢墮潛鮫出水遊客
牀沾處濕病枕聽來愁頗羨清江上風波不碍鷗

池上

雨霖臨池好橋平縱步宜濕泥勤燕子新水樂魚兒病
葉風多下團萍夕更移中吳消息惡吟賞淚交垂

秋暮

秋色去不反客心悲奈何病妨風土惡愁感歲時過弟

妹流離甚江湖喪亂多滄洲十月雪回首釣漁簑

題南野舊居

南山百畝地記得種瓜時風日蜻蜓下犂鋤布穀知輞
川流水在谷口主人非獨鶴青天外空亭自落暉

湖上

愛此湖上雨共君湖上遊乾坤雙短鬢江海一虛舟煙
景初相見春光不可求明朝下西崦相望意悠悠

參文殊禪道上得棲字

移舟泊淺渚風日便輪蹄
不雨江聲定長陰野意齊
香厨鐘後飯田舍午時鷄
入山應未得聊爾學禪棲

次劉德義懷金山韵

記得金山頂風煙八面開
乾坤留柱石滄海失蓬萊
夜色京江水春光般若臺
兵塵兼病眼長望幾徘徊

重遊大石次劉德義韵二首

病夫泉石性山雨健來過
花濡迴峽蝶松偃足藤蘿隔
歲青春別同羣白髮多
宦遊殊慰此高志未全訛

其二

幽事住雲泉湖光遠接連寺鐘山意動松雨磬聲懸石
壁開雲竇桃花隱洞天中原尚多壘此地合逃禪

望武夷時與黃元質同賦

客路未千里名山已萬重歌傳武夷曲興落幔亭峰密
竹幽幽鳥深溪隱隱春黃生詩句好吾得事遊蹤

有懷

獨客路千里美人天一方連宵入我夢今日寫新章白

月猶故國青山皆異鄉不堪秋信至梧葉下滄浪

謁屏山書院

隱隱屏山頂悠然見考亭衆星開分野一水入滄溟禮
樂今為盛門牆世必經平生鴻鵠志數問紫州城

謁考亭書院

西門猶闕里平地見滄洲謀道無虛日尋源直到頭德
言俱不朽廟貌正須優欲濟波濤濶臨流重澁羞

送王崇賢

黑雲天未厭清江船不開客情春草長國事朔風來嘆
世長卿枕疑人郭隗臺看君回綵服拜舞興悠哉

贈吾隱君兼懷惟可

誰言道學者正印自文山守黑惟空谷潛身到大還聲
名百世下交誼九垓間因爾懷君子江湖好駐顏

棠陵家觀釋宗林詩畫戲為一偈嘲之

蓮社祇能入林公許徑過法衣乘猶獠佛日動山河五
蘊元空寂三車亦障魔白牛載詞藻西去欲如何

冬日對白菊

白菊塵埃裏
脩然湮不緇
風霜忌太潔
桃李競當時
水德元如此
花神祇自私
遐方對燈燭
聊副賞心期

少谷集卷五

欽定四庫全書

少谷集卷六

明 鄭善夫 撰

五言律

懷人

客思苦作惡
美人長別離
愁深九日菊
夢飽故山芝
劫火明天地
秋聲入鼓鼙
銷魂仍病骨
行止昧前知

題黃隱君水居二首

人境不肯住水居猶滄洲青山如對隱白髮本無愁春
草詩魂合秋風樂事求鱸蓴興不淺聊定此生謀

其二

水居意自得海鷗來不妨老懷惟杖履秋事在林塘桂
槩依漁父菱歌出女郎逃名非故爾但恐失滄浪

釣臺

文叔為天子先生顧釣磯故人一夜話星坐舊山歸巖
瀨無今古羊裘有是非瓣香臺下拜素志尚依違

得閩中消息

閩中久無雨百穀盡枯焦魃虐延諸郡農工豈一朝何時免凍餒吾邑更征徭避地翻愁思餘生不自聊

對雪答太白山人

天地忽改色六花風亂投因之翠袖薄加我草堂幽照水梅自媚啣泥燕有求一杯思共爾日暮問行舟

哭龔道

海內君知我閩中我失君雲霄劍在壁風雨榻揚塵龍

見悲吾道烏飛念此身艱危有壯志南望重沾巾

旅夕逢所親述懷

乍見却悲歡相詢語夜闌數年罷道路諸弟泣饑寒井
竈還多故親朋有永嘆自憐飄泊甚聞此屹憂端

下瀨

廻溪去似箭亂石簇如鎗下瀨扶招急凌湍蕩槳忙未
妨臨灩澦翻喜得滄浪范蠡扁舟外風波更渺茫

贈王雙林遊宦海門

振鐸維揚去堂齋俎豆幽豈為蒼水使與度海門秋三
鱸隨風至羣龍抱日遊山陽遂可聽展轉憶良儔

送彭少叅進萬壽表

離聲言可惡子去似登仙敬述諸侯職懽呼聖主年青
雲纏禮服白浪靜樓船錫爾天閑馬黃金臺下傳

答方思道富陽見寄

浙水浩天涯吳門意已乖三年方數字半世渺孤懷萍
梗猶能合風塵未見偕富春霜雪裏却憶鳳階階

木假山

時行遊夢斜得斷木如山狀

已幸脫煨燼漂零故不辭肌膚渾盡剥丰骨坐稱奇崕
嶠羞相學雲霞信所為從茲別林藪深結主人知

宿七里潭

無數灘皆惡安恬獨此潭沂流心共澹汲古味能甘永
夜魚龍定空山鬼魅談高秋進蕭颺行役遍東南

小野堂對菊

小野堂前菊相逢滿意花諸君抱冰雪散地有煙霞倚

月神猶整當歌影故斜異時追此夕蕭瑟向瑤華

答曹仲禮見贈

未暇曹劉體逍遙了歲年聊應備土缶豈敢冒朱絃情
性人俱得咸英世不傳從茲習啞啞作用在忘筌

題程時言侍御和溪譜

君家好喬木遠影鬱婆娑桂樹青霄上桃花駭浪多高
峰迴日月大地湧星河近閱篁墩譜燕山豈啻過

題田給事一竹軒

美爾雲霄勢冷然冰玉姿空齋寄森爽獨立出喧卑尚
阻瀟湘對終收淇澳詩幔亭霜雪盛應長鳳凰枝

病居讀顧與新詩

伏枕殊方客秋風歲載陰鍊形功不就抵病意何深稍
出詞章網翻為著作淫頭風頓覺愈吾只愛陳琳

林滄洲下第赴荆門

憐君不得意歸鬢忽成絲更下荆門棹還聞巫峽悲禮
嚴徐孺榻義重象山祠應念投竿客終為帝者師

惠山酌第二泉

惠山好泉品清切錫城隅松石陰堪結蓮蓉翠不孤寺
虛流夜氣沙潤長秋菰笑挈二三子翔風近舞雩

憶思道

近憶棠陵子還朝定此時肯為黃歇客興在白雲司意
氣吾能共江山君最奇夔龍格心事天意要人為

讀備遺錄

神堯無信史誰紀革除年龍虎風雲上山河涕淚邊夷

齊偏守死王魏總知權三復春秋傳微詞今不傳

望鴈宕

鴈宕青到眼天南秋復涼寧辭北山屐來傍水仙王越
鳥隨風化甌童觸霧黃未須悲道路前是武陵鄉

再哭近夫

近夫吾益友失汝自吳江末世英雄短平生涕淚雙參
乎真悟道回也未為邦不見牛刀試青田俗盡龐

劉實夫靜觀樓

劉子吾邦秀高樓元氣邊定心還到眼慧日正行天風
物無拘礙江山且歲年平生騰踏志終要九潘淵

白將軍

將軍出武威仗劍鎮東陲氣壓風雲陣秋生熊虎姿長
揮白羽扇豈羨銳頭兒數載傷多壘雲臺及盛時

咄咄

宿國清寺有懷往事

咄咄長廊下倡歌誰為聞世人皆夢寐之子獨風雲土
淨菩提路天垂星斗文猶存頂神咒至語未曾分

贈歐陽崇道

使君廊廟器祇惜潁川名
世事憂無盡吾邦兆已行
況逢王者作要使海波平
倘及莘中隱深耕自性情

哭仲默

去年孫復死今復哭何休
霄漢冥交盡嵩丘正氣收
操戈吾豈敢懷寶爾終投
祇益文章價年年照斗牛

謁紫陽精舍

山水奇如此乾坤氣所儲
昔賢遺筍蛻異代儼門廬
歲

晏芝苓長天高風露餘蹉跎逐簪笏尚愧紫陽居

三陟

憐君憂思劇三上白雲山風樹吹無盡鵲原望不還堂
階抱古恨松栢變秋顏莫以歌終曲人生涕淚繁

春日懷京華諸友

聞說神龍起羣賢一網提中原刑白馬南國且黃鸝夜
楫誰同擊春江他自迷無能逐公子錫宴上林西

寄容臺舊僚友

金匱要略卷六
上德符元命南宮列雉才周王郊祀畢漢日辟雍開法
駕新承幸芝壇定數陪百年大禮樂述作意悠哉

秋日寄赤城諸友

幾載不相見天台葉又飛行藏歸一是堯桀自相非江
海完吾志星霜變客衣風期與雲會莫遣道心微

夏雨

南天春苦旱咎在歲星沉四月禾苗歇三農雨望深油
雲膚寸合一似雨黃金君王社稷主要識上天心

張起溟得子

聞得充閭慶青天眼不孤君猶倚桐樹此是鳳凰雛昔
日三蘇出眉山萬木枯鄉書日暮至定報有嘉符

元夕登鰲峰絕頂

有序

元夕余從海上與木虛子登鰲峰據奇石摩挲古檣
樹忽聞峰頂瓦礫聲趨而從之見二老拄杖箕踞相
顧一大笑乃引酌嘯歌月隱隱出雲際下觀萬井燈
火星河倒浸陸海中余諸人者猶夢天然奇哉惜哉

高子王子遠莫可致沛夫泥俗招之不來也遂折古
梅枝以貽懷者歸而北斗指寅矣遂作韻語以引諸

子

共爾尋芳酌復從鰲頂行風煙有元夕星漢下孤城石
祖他年夢山公一笑迎高歌倚梅樹瞻注有餘情

哭張士孚

同會今何在斯人天下無盛時看諫草何日奠生芻狐
鼠私相慶衣冠勢益孤空餘青史上遺簡載名儒

答陳鑑

武原陳仲舉惠我古苔篇讀罷生陰籟知君玄又玄高
賢惠遠社歸客洞庭船何日尋芳約蓬山種玉田

除夕二首

忽忽屠蘇夕匆匆吳楚春歲華無奈守酒盞可憐頻世
短聊看斗時艱復問津劍文差不翳猶得慰情親
喪亂滿天地風煙無古今吳門又除夕粵客未投簪燈
暈他年夢椒花故國心翻憐癡兒女嬉笑夜堂深

秋月

初昏見秋月耿耿即西傾河漢留光景關山入杳冥衆
星森北向一鳥浩南征莫遣微雲起渠能穢太清

呂梁

又

數載河為患悵然思禹功源從西極下水到呂梁雄天
塹長淮北地維滄海東應悲瑩篴曲宛轉意何窮

王南渠隱居

冠山龍臥處流水近滄洲形勝東南地堂齋烟雨秋諫

書存事業逐客且林丘只看桐溪上星文動斗牛

大田篇

君王提一旅禮法用三驅木落鴻能矯天寒虎在嵎風
塵收猛士騎射跼文儒銳首誰家子人間大丈夫

得友人書

每逢閩地客數問爾滄洲搖落意如此煙波去無繇傳
楫還長擊高柴未損憂因風寄幽獨蚤晚大刀頭

再送李曲江

曲江山水縣暇日好彈琴要將流水意遍作潁川吟王
風周末異瘴色日南深更點分明處縣知令尹心

懷思道

聞君留闕里勾當未曾還五月過泗水何時登太山道
存夫子室禮接魯生顏星駕飄飄去雲天迥莫扳

寄小野

俛侯隱南國食祿二千鍾誰識神仙骨長栖富貴叢梅
花行嶺外鴈字過蠻中何日飛尋女而將黃鶴同

五言排律

劍州

溪聲下點淡山意會延平激漩當天險橫霄極地形黃
堂嚴上界塵舍倚高城龍劍真能合虹橋本易成茶菰
流土物稷秣得人生李子濂伊嫡劉滋卓魯勅士多通
古學民不廢春耕何處深傳檄茲邦乃苦兵方將採竹
箭奚暇糝藜羹正賴賢官府艱虞繫物情

除夕二首

百戰無寧日窮年作宦情故山惟夢到異域獨燈明冰
雪淹公子風塵掩客星無家杜陵老經亂鄭康成北望
關河固東遊歲月更安危仗王室鼎食愧昇平

三元今夕到羣盜幾時平河洛新流血齊梁日請兵羽
書連樂國鞞鼓動神京大將真無敵元兇未就烹地悲
殺氣盛天苦歲功成進退吾何據椒盤空復情

送司徒孫公歸安陸五十韻

國步多艱日黃圖八葉時正人俱遜避冥運莽推移在

昔先皇世明公早典司菁華臨騁褻瞻聽下須彌德
業周王佐賢勞漢度支坐舒千里足遍察萬方眉時值
中原擾頻徵北鄙師向非籌百萬安得活瘡痍理劇虛
投及回淳重執規赤心醫國石白首向陽葵朝著留清
望廷爭抗直詞杜公良不忝樊子豈無奇祿秩方登俊
兒童不免饑少焉看短髮率爾問青芝懇切封中疏闕
淤夢裏思王言溫莫挽傳馬去猶馳肱股定虛曠麒麟
難繫羈韋年寧待暮常版却應誰允矣修初服忻然集

故知養真同在洛憂世類還睢
輦輅北宮子鹿裘榮啓
期釣溪人罕識遊岳鶴長隨信
是勞筋息其如柱石衰
品堂喧燕雀城社保鸛狸黔首殲
金氣旄頭直玉墀豈
惟餘狡兔遽使有鴟夷浩蕩南溟
徙差池北斗垂帝能
忘反側天未欲雍熙前席追才子
高軒脊健兒汾陽終
復起回紇定深疑世道今如此言
余何所之狂謚通劍
術憤激撤書帷猥作龍門客載歌
淇澳詩未緣經品藻
竊幸受鑪錘食忝侏儒粟才妨寢廟
犧役形酬顧遇鍾

骨為噓吹永願參徒御猶希附鼎彝此心何覲豁人事
竟離披貢禹情堪弔任安義匪疵幾能容傲吏奚止失
師資悵悵悲鳴缺奄奄嘆守雌肩隨遑點染影弔趣磷
緇便作開籠鳥還慙掉尾龜即尋鷗鷺好甘與簿書辭
采藥靈源洞紉蓀少谷陂靜便粗布褐安穩小茆茨述
作刑司馬冠纓薄李斯嵩高塵不雜來挹九峰姿

聞吾廷介避亂客死藁葬道隅

識面胥臺夕論心許墅時功名非爾輩文藻是吾師命

薄長遺世才高更忍饑天如產麟鳳王不夢熊羆久着
東山屐頻歌濮水詞邨原明進退杜甫昧生涯已是哀
黃髮仍兼陷赤眉修身渾欲到得禍一何奇寂寞棖楹
折荒蕪氣運衰人皆牖下死子有道傍疑叔寶時多惜
嵇康我獨悲君門數行淚不但致吾私

壽林大司馬四十韻

當代論耆德先生第一人行年老益壯浴已日猶新九
牧衣冠胄三朝柱石臣時流立標準前輩想丰神伊昔

遭平世超然充大賓東寮注柳肅內史倒陳遵奇思過
常調修能異等倫一生隨日馭十載在成均古學薰移
俗名賢類受甄牽裾留短草啓事起枯鱗瓊珮辭仙仗
金陵秉大鈞豈無雲錦線可補舜衣鶉鴻運丁天厭元
龜卜世屯文狸翔粉堞玉玦下楓宸溫國言歸洛宣尼
罷問津歲功成者退初服誓當伸几杖蒼生慕松筠白
髮親起居全矍鑠容色愈溫純不論臨卑幼都如飲酪
醇達尊人代少幽意歲華頻寄癖泉山麓移舟越水濱

猶能作小楷亦稱戴高巾奚用推洪範終然比大椿壽
臨文彥博子得范純仁極北陳情切滇南稅駕真言將
懽菽水不是憶鱸蓴臣父深思子臣兒願委身明王
念勛舊溫語藹絲綸李密近還蜀張良未謝秦銀魚綰
房杜玉樹集陳荀萊綵偏宜晚潘輿每及晨風吹綠野
暮花發錦堂春刺史宣前烈春官振後塵品題惟鳳鳥
圖畫必麒麟二月山川麗全閩氣象臻嵩乎鍾匪物甫
也降茲辰度曲來鸚鵡稱盃拜縉紳龍門登尚忝驥尾

附何因感激吾將仕沾濡俗到淳太平若有象早晚下蒲輪

送周方伯入楚五十六韻

南來日月淺歛作洞庭遊宦達多離圻旌麾還阻修人
情烏石雨仙路豫章舟樹直黃陵廟花明白鷺洲攀軒
啼老少擁篲振王侯毒草祠能久濂溪井尚留賢聲望
宰輔伊昔盛才猷八辟叅邦典羣疑反楚囚青蓮分黑
白丹筆幹宸旒退食惟書卷攢眉視貴游坐茲不速化

寧自向明投先帝需梁棟春官雜料膠匪材隨鑒澈
是歲辱甄收分忝門生列知懸孺子酬青雲長契濶白
帝正岵嶠公去安邊徼余歸滯故丘數年鱗杳杳兩地
髣髴颺諸葛綏西土文翁化益州夷酋達禮樂武弁冠
貔貅自古賢人遠殊方聖主諏朔風吹鳥道春雨下
龍湫天共滇池遠人兼泮水幽兩川思几杖六詔賴懷
柔燮俗元來野華風今始流文鵷既翾翾鳴鹿亦呦呦
欲見唐虞理何煩猿狖愁幾時卿月照復爾使星浮三

晉悲歌切中原盜賊稠徬徨家室走感激歲時適道在
無荆棘時艱任寇讎終焉脫虎口直擬謝蠅頭天欲昌
王室帝能追馬周風高沙塞暮草歇鴈門秋十二事皆
舉權豪勢不勾食芻無款段出牧盡驂騮世待英雄急
公宜物色求無諸所胙土馬亮載鳴騶玉節沾應得風
謠採未休先聲靖強禦能事屬歌謳霄漢瞻洪翮泥塗
非好仇狄籠充實忝徐榻下何綢繆縛南山虎翻驚北
海鷗倚風悲駘蕩望斗念偃僂貧貸鄰人粟寒披季子

裘熱中聞舐痔畢意避犧牛名位爭相笑悲歌不自由
誰能見客意何以解吾憂夜雨聽希曠春波轉繆悠大
廷稽職業南服趣恩庥江漢雄藩鎮夔龍注廟謀雙旌
一以遠千里祇須樞即欲隨黃鵠終知愧禿鷲草深鸚
鵡塚天迥岳陽樓范老端憂樂禰衡招咎尤獨醒心縷
縷北面意悽悽公若登三事須張竟野罍

鉛山書事十二韻

聞道坎山裏羣豪撓信州仇家縣膽在死士散金收趙

厠機關重秦庭報復稠執言修大慙負固震諸侯落日
閭閻悲風井逕愁撫綏須早計變亂未干休赤子元
無罪紅巾揆所由至誠馴虎豹極處動貔貅六邑疲供
應三農訟咎尤風塵將不靖土地爾何求即鑒前車覆
毋貽後事憂朝廷諱首惡賢相合深籌

東遊

已是閉關月漫遊何處邦北風帆勢直南紀歲華妨負
勝輕河嶽哀時挹伯王衣冠明葬處俎豆盛蠻方忽憶

春秋際兼懷種蠡良圖王功已已去國意茫茫萬事空
搔首諸賢足斷腸東征効蘋藻大觀出玄黃雨蝕曹娥
廟山疑謝傅堂汎波平憤懣舊燕落尋常忼慨吾能賦
風流誰更狂飄飄王逸少磊磊賀知章真帖蘭亭秘遺
榮剡水光鑑湖秦望近雲寺若耶荒皓齒此溪女紫騮
何郡郎隔花相問姓采菲欲遺芳未逐支公隱能無許
掾藏雪舟行獨遠禹穴探尤長木客胡麻飯山夔薜荔
裳桃花源不昧野鳥恨難忘自此升台嶽騎驢過石梁

仙風去若脫八極信翱翔

即事

赤縣山河在黃龍沙塞長
秋憂邊部落不着舜衣裳
騾騎年年沒單于世世強
僕姑寒射月簫簟夜含霜
寶轂猶深入金綃或轉傷
前車未為速神武有英皇

得家信

未覺今為是田園報已荒
蠻雲深結白朔日迎含黃
社稷已如此公卿猶病狂
冠裳風一變戰伐意何長
爵可

加天位勛兼擬法王甘泉久抗疏不得達明光

野江為舒國裳父作

徐穉藏身在南州卧不妨經年歌白石乘月下滄浪江
抱洪都府堂開輞口庄藍田種有玉磻水釣惟璜會見
蛟龍起俄驚鶴鶴翔無由相高志把贈芟荷裳

鄉人

令叔吾兄弟仲容賢姪行宦情遊里閭人事近陰陽何
路通閩徼中原入戰場應憐起草石竟失浣花堂太乙

長遷次撓捨轉耀芒山河醉眼底別爾思茫茫

與思道叙別四十八韻

憶昔勾吳日相逢雲水鄉于時最孤寂得汝共翱翔豈
倦登臨費兼存藥石良三春謝氏屐十度遠公堂大石
留腰帶陽山接羽觴秋風白蓮賦落日洞庭航坐聽吳
趨曲行歌子夜央時時動星象處處有文章雨夕舟偏
討公庭事不妨投膠情最密麗澤意何長作賦相如病
彈琴宓子臧君才當十倍為宰僅三霜備見嘉禾出胡

云貝錦張邑皆懷范甯人只妬鄒陽日月難終掩聲名
轉益揚幾時停谷鳥獨往釣溪魴人事尤參錯兵戈逐
喪亡爾歸頻灑血余去苦回腸百粵風塵色三衢荆棘
場棠陵居獨穩太末勢堪傷消息傳誰健艱難到女旁
鴻飛多不及豹隱但相望已分生無日何期此對牀精
神寧少壯鬢髮各滄浪驟見猶疑夢翻思祇欲狂人情
更憐並天意遂行藏妻子盡相信形骸真所忘緇塵心
少稱青眼慰多方管鮑平時義雷陳後代光曠懷卑藻

飾素業略侯王葵藿元同志雷霆詎有常
賜環憐是月持節向何邦
太液秋風落桑乾木葉黃
條然改節物自此判參商
向秀悲無奈杜陵憂未遑
漢皇惟好武堯德本垂裳
欲折淮南馘行穿涿鹿楊
迨迨思汲黯隱隱忌姚萇
萬騎虛邊戍深宵引御幢
恒山窮鳥獸上黨泣壺漿
征伐名雖正巡遊志莫荒
秭須移北極況已復南昌
福德知何處欖槍屢耀芒
頓能憂絕域翻不備蕭牆
儒術元迂濶華裾載禍殃
申屠甘絕迹大邠尚為郎
江漢

金史四庫全書
卷六
情何極鱸葦興可償歸期晚自計分手各茫茫

臺上

塞水波聲杳宮牆木葉深君王載戎服歲晚過汾陰
白蘼風雲氣玄冥鴻鴈音稻粱猶有分軒冕竟何心祇
放中原鹿翻田上苑禽憂時誰向道端合早投簪

送人之金陵

金陵吏隱去結綬興悠哉滄海東南奠長江巴蜀來白
門萬柳樹娟娟接行杯晉室風流在猶傳謝傅才花繁

佳麗地天近鳳凰臺
祇憶鱸魚美鄉書旦暮回

送李川父赴沔陽

一杯燕市酒別爾意難平
嵩嶽冥棲客沅湘遊宦情
南風吹錦旆遙度竟陵城
吳楚兵初解鄒枚道自行
如何歌郢曲祇以觸猿聲
宣室思才子能無召賈生

衛河集別

去國心仍苦風塵病未休
六飛淹歲月八極想遨遊
水動魚龍夕雲盤鸛鶚秋
江山回紫氣沙塞度青牛
祇有

簪萍戀聊為文字留遐心渺無盡寄與衛河流

吳隱君山居

吾慕漢陰老清修難具論兒童少機事麋鹿到柴門
備見幽人古還聞靜者尊高賢牀下拜龍虎鼎中喧
古道日已遠仙風今罕存縣知出世意接手入湘源

永陽方廣巖觀從兒戲入靈羊谷

共有方巖志鳴橈入永陽山疑子午谷水是武陵鄉
石室羅星漢風泉積混沌直尋前代迹多見昔人狂
龍德

存幽側神功大悔藏會須乘白鹿莫倚過靈羊采秀青
林杳看雲白業長儻逢蔡道者為彼出迷方

贈鄭中丞二十韻

皇道中興日關河氣鬱盤卿雲回栢殿麟趾出人間帝
用徵良弼人今起謝安玄纁到滄海夫子罷黃冠眷
注時難得才賢印不刊洪都開大府節鉞撫諸蠻舉目
旬宣地知君涕淚繁囚梁脫虎口歸漢遠龍顏顛倒多
方試悲悽九返丹匡廬留業光彭蠡厭波瀾况值荆吳

變何論土地殘主憂寧俟駕君出豈移山岳水思釣
候茶溪接露翰白頭吟不斷青眼迴猶看未分虛縣榻
新詞議築壇同舍九鯉日並考木蘭槃櫟社堪長棄龍
沙會起蟠霞裾余獨引霄鬣爾難攀茅拔多連茹時明
且釣磻烟波去無極相報一綸竿

送林待用司空四十韻

海嶽開靈秘東南孕雋畸公才驚代出吾道要人為驚
鷺時希有珊瑚世共知郢斤森在手剛斧斫先枝王業

尋常就天朝際會遲乃嬰喉下阨轉聽隴頭悲脉脉餐
元命跋跋飾履綦經過盤錯遍展轉廟廊思直道淹黃
髮餘生隨白鷺經綸一以卷霄漢欲何之霞外修靈氣
槎邊立釣絲衆星還識斗百草秭如芝蜀道憂多壘王
言召子儀星奔赴國難虛擣拔臬旗雲鳥元相法風塵
不自夷千秋誅白帝一笑下峨嵋物態疲衣狗年華變
意鷗留侯乃辟穀尼父退修辭蘭渚煙波定雲莊歲月
馳寧云近耄耄忽漫致雍熙紫氣流金闕黃龍下玉

堦君王是堯舜輔弼必臯夔三統收今日羣賢網在茲
丹青得舟楫畋獵豈熊羆只簡先生去頻傳帝語來
玄圭表錫望黔首視安危如此中興主那看後命推意
成魚水合道在鳳麟羈鐘鼎人能鑄棟梁今不衰願聞
歌帝力直擬察氓眉勲業青冥潤文章後輩師眼青相
見日心赤索居時魚鰓身三偃龍泉手一提不成赴溝
壑詎敢息鎡基岷水青陽逼滄溟錦纜移永懷登藻鑑
况惜別師資幽獨行將暮娉婷迥自怡長空古意澹落

日壯心飛抱室誰同調彈冠此作期因風送黃鵠目盡
五雲涯

見蜚鴈

涼風動沙磧朔鴈至紛紛為避陰山雪翻衝楚澤雲
噉清作籟總總字成文意適稻梁得心驚弋彈聞時懸
出塞夢肯妬下韞助遠媿青田鶴高飛絕世氛

寄戴仲鵠延平

嗟爾投荒在十年歸髯新豹文淹瘴癘龍節漸風雲往

事收殘淚清時錄遠臣別深魚鴈濶迹久鳳麟馴余亦
豐城物思君劍水濱客衣渾自浣不染洛陽塵

寄時行憲副

聞君靖百粵閒擁節旄遊鏡吹軍門靜雲山開府幽飛
書報谷口邀我入羅浮一自滄溟別長驚碧樹秋乾坤
今始泰勛業爾應留儻遂丹砂計相尋海上洲

書情十二韻

毛生辭辟命王績遁人羣賢者詎可測醉鄉聊自云抗

情千木石著論逼河汾而我風塵質依依所聞碧山
隨舊業白日近浮雲殷道求伊傅周王化汝墳古風何
契濶吾志底辛勤耻掉留侯舌羞稱管氏勛民窮思
聖世身遠戀明君落日天西夢幽憂記不分龍蟠時
必作鵬息氣方殷此意終難就吾將邁紫氛

答人問滄海

久作持竿客滄洲話獨真潮聲雄度浙海勢側分閩星
漢涵無地風雲變有神蜃樓開弱水鼇極斷河津失意

歌漁父離羣憶古人惟應白鷗鳥浩淼得相親

俠客行

萬里金微道防秋世不同秦城時借寇漢女歲和戎落
日吹楊柳沙場恨未窮莫收張掖北復失酒泉東天子
遑推轂將軍誓挂弓黃金裝鴈轡白壁飾蛇褱霸氣天
山雪邊聲瀚海風死生惟義激部曲總驍雄羌笛回青
草燕歌感白虹營開月暈破戰勝賀蘭空直擣關氏北
橫行沙塞中始知魏絳怯豈說貳師功洗甲蒲昌海揚

兵首藉峰馳歸大宛馬一一渥洼龍賜邑連京洛圖形
列上公男兒雪國耻不在藁街封

寄題七峰隱居十韻

棠陵書問至命我七峰歌我今雙髻改其柰七峰何憶
避吳趨寇會遵孟瀆河眼深孫楚宅心激魯陽戈霜鏑
干雲日霞居享薜蘿猶聞釣蛟蜃寧復畏湖波浩嘯蘇
門誦名方海上科賢豪似爾少膏馥及人多芝菌盤雷
洞山川抱曲阿吾將濟汝漢初路為經過

岳山留別諸子

握手情何盡為郎髮已秋那為岳上別轉作秣陵遊賈
傳狂唯甚王陽道必優時猶遇舜禹志竊慕伊周風斷
黃金市雲愁白鷺洲從容赴散地一似卧林丘寶劍緣
輕試明珠豈暗投經綸晚自計只漫釣魚舟


哭朱侍御

哭友魂初返兄今復訃音杞憂元不寐顏樂秖須尋江
海投膠意乾坤攬轡心成言俱寂寞勝事竟銷沉邦國

賢豪盡關河涕淚深
瓣香與絮酒咫尺到山陰

憶昔

憶昔先皇帝黃金高築臺
劇辛自趙往鄒衍復齊來
今日風波事誰當砥柱材
金雞還浩蕩黃雀總涓埃
久見文昌厄何論國士灾
君看黨錮傳千古使人哀



少谷集卷六